

BOSNA I HERCEGOVINA

BRČKO DISTRIKT BOSNE I HERCEGOINE

OO DEMOKRATSKE FRONTE BRČKO DISTRIKT BIH

**ZAKON
O PRIJAVLJIVANJU I PROVJERI IMOVINE
NOSIOCA JAVNIH FUNKCIJA U BRČKO DISTRIKTU
BiH
(NACRT)**

Februar, 2021. godine

NACRT ZAKONA
O PRIJAVLJIVANJU I PROVJERI IMOVINE NOSIOCA JAVNIH
FUNKCIJA U BRČKO DISTRIKTU

POGLAVLJE I – OPĆE ODREDBE

Član 1.
(Predmet)

- (1) Ovim zakonom utvrđuje se obaveza izabranih i imenovanih dužnosnika, nosioca izvršnih funkcija i savjetnika (u daljem tekstu: nosioci javnih funkcija) da prijave zatečenu imovinu i prihode, porijeklo i promjene imovine i prihoda kao i poklone koje dobiju u toku obavljanja javne funkcije (u daljem tekstu: podaci o imovini), način prikupljanja, obrada, korištenje, zaštita i čuvanje podataka, kao i dužnosti i obaveze organa nadležnih za provođenje i nadzor nad provođenjem ovog zakona i druga pitanja od značaja za provođenje ovog zakona.
- (2) Obaveza iz stava (1) ovog člana odnosi se i na dostavljanje podataka o imovini bliskih srodnika i povezanih lica nosioca javnih funkcija.

Član 2.
(Principi djelovanja)

- (1) Nosioci javnih funkcija u vršenju javnih funkcija moraju postupati zakonito, efikasno, nepristrasno, časno, te se pridržavati principa odgovornosti, poštenja, savjesnosti, otvorenosti i vjerodostojnosti.
- (2) Nosioci javnih funkcija ne smiju biti ni u kakvom odnosu zavisnosti prema licima koja bi mogla uticati na njihovu objektivnost.
- (3) U vršenju javne funkcije nosioci javnih funkcija ne smiju svoj privatni interes stavljati iznad javnog interesa.
- (4) Zabrana koruptivnog djelovanja: nosioci javnih funkcija ne smiju u obavljanju svoje dužnosti tražiti ili prihvatiti nedopuštenu korist za obavljanje svojih dužnosti.
- (5) Transparentnost i javna kontrola: obavljanje svih javnih funkcija bit će transparentno i podliježe javnoj kontroli, a posebno pravu građana da budu upoznati sa ponašanjem nosioca javne funkcije.
- (6) Nosioci javnih funkcija ne smiju koristiti javnu funkciju za ličnu dobit i dobit lica koje je s njim povezano.
- (7) Nosioci javnih funkcija ponašaju se savjesno i odgovorno, ne ugrožavaju povjerenje i pouzdanje građana, poštuju zakonske i druge propise kojima se određuju prava, obaveze i odgovornosti u obavljanju javne funkcije.

Član 3.

(Svrha obrade podataka)

Svrha obrade podataka o imovini iz člana 1. ovog zakona je obezbjeđivanje provođenja principa iz člana 2. ovog zakona, te transparentnosti, zaštite integriteta javne funkcije, sprječavanje koruptivnog djelovanja za vrijeme obavljanja javne funkcije, te sprječavanje nezakonitog bogaćenja.

Član 4.

(Pojmovi)

(1) Izrazi korišteni u ovom zakonu imaju slijedeće značenje:

- a) „izabranim dužnosnicima“ smatraju se zastupnici u Skupštini Brčko distrikta (u daljem tekstu: Skupština);
- b) „nosiocima izvršnih funkcija“ smatraju se gradonačelnik, zamjenik gradonačelnika, glavni koordinator Vlade i šefovi odjeljenja, direktori i zamjenici direktora agencija, fondova, javnih preduzeća, javnih ustanova i institucija čiji je osnivač Brčko distrikt BiH, članovi skupština, upravnih i nadzornih odbora direkcija, zavoda, javnih ustanova, javnih preduzeća i drugih institucija u Brčko distriktu BiH koji su izabrani i imenovani, ili je za njihov izbor ili imenovanje data saglasnost od strane Skupštine Brčko distrikta BiH ili Vlade Brčko distrikta BiH.
- c) „savjetnicima“ se smatraju savjetnici izabranih dužnosnika i nosilaca izvršnih funkcija;
- d) „bliskim srodnikom“ se smatraju bračni i vanbračni partner, dijete, majka, otac, usvojlac i usvojenik nosioca javne funkcije;
- e) „povezano lice“ je bliski srodnik, srodnik u pravoj liniji krvnog srodstva, srodnik u pobočnoj liniji do trećeg stepena krvnog srodstva, srodnik po tazbini do drugog stepena, dijete bračnog partnera ili bilo koje pravno ili fizičko lice koje je sa nosiocem javne funkcije u ličnoj, političkoj, ekonomskoj ili drugoj vezi koja bi mogla uticati na objektivnost u radu nosioca javne funkcije;
- f) „institucija“ u smislu stava (1) tačke b) ovog člana je svaki subjekt kojeg je osnovao Brčko distrikt, koji vrši javna ovlaštenja i koji ima svojstvo pravnog lica;
- g) „imovinu“ predstavljaju stvari i prava koja je stekao nosilac javne funkcije, a obuhvata sve stvari i prava, a posebno nekretnine i pokretnine, potraživanja, poslovne udjele, vrijednosne papire, novac, umjetnine, plemenite metale i drago kamenje u njegovom vlasništvu ili vlasništvu njegovog bliskog srodnika;
- h) "poslovni udjel" u smislu stava (1) tačke f) ovog člana je ulaganje novca, stvari i prava u vlasničku strukturu preduzeća;
- i) „poklon“ predstavlja svaku isplatu, djelovanje, uslugu ili predmet od vrijednosti učinjene izravno primatelju, bez naknade ili očekivanja naknade. Pokloni primljeni od bliskog srodnika, kao i pokloni čija vrijednost ne prelazi 200,00 KM vrijednosti nisu obuhvaćeni ovim zakonom;
- j) „protokolarni poklon“ smatra se poklon predstavnika stranih zemalja i međunarodnih organizacija prilikom službenih posjeta;
- k) „obavljanjem javne funkcije“ smatraju se poslovi koje obavljaju lica iz tačke a) do c) ovog člana;

- l) „nosiocima javnih funkcija“ u smislu ovog zakona smatraju se lica iz tačke a) do c) ovog člana.
- m)

POGLAVLJE II – NADLEŽNOST, OBAVEZE I NADZOR NAD PROVEDENJEM ZAKONA

Član 5.

(Nadležni organ za provođenje ovog zakona)

- (1) Kancelarija za borbu protiv korupcije Brčko distrikta (u daljem tekstu: Kancelarija) nadležan je za provođenje ovog zakona.
- (2) Vlada Brčko distrikta dužna je osigurati donošenje neophodnih akata i uspostavljenje ove Kancelarije, kao nezavisnog tijela od organa izvršne i zakonodavne vlasti Brčko distrikta, u roku od 60 dana od dana stupanja na snagu ovog Zakona.
- (3) Kancelarija mora biti maksimalno osposobljen za obavljanje svojih funkcija u pogledu neophodnih ljudskih i materijalno-tehničkih resursa.
- (4) Odobrena budžetska sredstava za funkcionisanje i rad Kancelarije ne mogu biti manja od 0.05 % prihoda Budžeta Brčko distrikta na godišnjem nivou.

Član 6.

(Kontrolor ličnih podataka o imovini)

- (1) Kancelarija je nadležna i ovlaštena za prikupljanje, provjeru i obradu podataka o imovini nosilaca javnih funkcija, uspostavljanje i vođenje Registra podataka o imovini (u daljem tekstu: Registar), kao i pokretanje prekršajnog i iniciranje krivičnog postupka zbog povreda odredaba ovog zakona.
- (2) Radi obrade podataka o imovini, Kancelarija vrši:
 - a) prijem prijave podataka o imovini;
 - b) unošenje i ažuriranje podataka o imovini u Registru;
 - c) čuvanje ličnih podataka o imovini na period od pet godina nakon završetka funkcije;
 - d) uništavanje podataka nakon isteka roka od pet godina od vremena završetka funkcije;
 - e) provjeru podataka o imovini.
- (3) Kancelarija vodi Registar, kao zbirku podataka o imovini i vodi se ručno ili sredstvima za automatsku obradu podataka, u skladu s propisima o opštoj i tehničkoj zaštiti ličnih podataka,
- (4) Pored Registra iz stava (3) ovog člana, vodi se i dosije za svakog nosioca ličnih podataka o imovini, koji sadrži priloženu dokumentaciju nosioca ličnih podataka, koji se čuvaju i uništavaju ili vraćaju nosiocu ličnih podataka u roku propisanom u tačkama c) i d) stava (2) ovog člana.

Član 7.

(Nadzor)

- (1) Skupština Brčko distrikta prati rad Kancelarije, razmatra informacije Kancelarije, te druga pitanja oko provođenja ovog Zakona.
- (2) Skupština se ne smije miješati u svakodnevni rad Kancelarije, niti tražiti informacije o pojedinačnim slučajevima.
- (3) Za potrebe praćenja nadzora nad ovim Zakonom, Skupština može zatražiti posebne izvještaje o aktivnostima iz nadležnosti Kancelarije.
- (4) Kancelarija podnosi informacije Skupštini svakih šest mjeseci gdje informiše Skupštinu o radu, prikupljenim informacijama i uočenim nepravilnostima, a u skladu sa nadležnošću utvrđenom ovim zakonom, te ove informacije Kancelarije objavljuje na svojoj web stranici.
- (5) Informacija Kancelarije sadrži statistički obrađene lične podatke o imovini, i to:
 - a) ukupnu vrijednost i porijeklo zatečene imovine i imovinskih prava nosilaca javnih funkcija, odvojeno prema nivoima vlasti;
 - b) uvećanu vrijednost imovine koja je nastala u izvještajnom periodu na imovini iz tačke a) stava (6) ovog člana;
 - c) vrijednost evidentiranih poklona u izvještajnom periodu.
- (6) Pored podataka iz stava (5) ovog člana, informacija sadrži:
 - a) pojedinačne slučajeve nezakonitog povećanja imovine, odbijanja dostavljanja ili dostavljanja netačnih ličnih podataka, u slučaju da iste utvrde nadležni organi u izvještajnom periodu;
 - b) izrečene prekršajne kazne;
 - c) podnesene prijave nadležnom tužilaštvu.
- (7) Sjednica Skupštine Brčko distrikta je otvorena za javnost, kada se razmatra informacija Kancelarije iz ovog člana.

POGLAVLJE III – PRIJAVLJIVANJE IMOVINE

Član 8.

(Imovina za prijavu)

- (1) Prijava sadrži detaljne informacije o imovini i prihodima, kao što su:
 - a) pravo vlasništva na nepokretnim stvarima u zemlji i inostranstvu;
 - b) pravo vlasništva na pokretnim stvarima koje podliježu registraciji kod nadležnih organa u zemlji i inostranstvu;
 - c) pravo vlasništva na pokretnim stvarima u vrijednosti većoj od 5.000 KM u zemlji i inostranstvu;
 - d) dionice, akcije i obveznice i udjeli u pravnim licima i drugi vrijednosni papiri u zemlji i inostranstvu;

- e) depoziti, dividende i kamate u bankama i drugim finansijskim organizacijama, u zemlji i inostranstvu;
 - f) prava po osnovu autorskih, patentnih i sličnih prava intelektualne svojine u zemlji i inostranstvu;
 - g) finansijske obaveze prema fizičkim i pravnim licima u zemlji i inostranstvu u iznosu višem od 5.000 KM, i
 - h) izvor i visina godišnjih novčanih prihoda u zemlji i inostranstvu.
- (2) Kada je imovina bliskih srodnika odvojena, prijavljivanje se obavlja posebno za svakog člana sa registrovanom imovinom na njegovo ime i prilaže se prijavi lica koje ima obavezu za prijavljivanje.
- (3) U prijavi prihoda i finansijskih obaveza, nosilac javne funkcije navodi iznos, vrstu izvora svakog prihoda, iznos i vrstu finansijskih obaveza.

Član 9.

(Prijavljivanje imovine prilikom preuzimanja dužnosti)

Nosilac javne funkcije je obavezan da prijavi imovinu iz člana 8. ovog zakona, u roku od 30 dana od dana preuzimanja javne funkcije.

Član 10.

(Godišnje prijavljivanje imovine)

Godišnje prijavljivanje imovine iz člana 8. ovog zakona obavezno se vrši tokom vremena obavljanja funkcije u periodu od 1. do 31. januara svake kalendarske godine.

Član 11.

(Prijavljivanje imovine poslije završetka dužnosti ili razriješenja)

- (1) Nosilac javne funkcije je obavezan da podnese prijavu imovine iz člana 8. ovog zakona, najkasnije 30 dana nakon završetka javne funkcije, po bilo kojem osnovu.
- (2) Pored obaveze iz stava (1) ovog člana, nosilac javne funkcije dužan je dati izjavu da nisu pokrenute nikakve aktivnosti sticanja imovine iz člana 8. ovog zakona, po završetku javne funkcije po bilo kojem osnovu.

Član 12.

(Prijavljivanje na zahtjev Kancelarije)

Kancelarija u svako vrijeme može da traži od nosilaca javnih funkcija da dostave traženu informaciju o imovini iz člana 8. ovog zakona.

Član 13.

(Pravo uvida u Registar, ispravku, brisanje i blokiranje podataka)

Nosilac javne funkcije ima pravo uvida u svoje lične podatke o imovini koji se vode u Registru i pravo da zahtijeva da se njegovi lični podaci o imovini, za koje se utvrdi da su netačni, ili da su pogrešno navedeni, ili obrađeni na drugi način koji je suprotan zakonu i pravilima koji se odnose na obradu podataka, isprave, izbrišu ili blokiraju.

Član 14. (Primanje poklona)

- (1) Nosilac javne funkcije ne može tražiti, niti primiti poklone ili druge pogodnosti za sebe, niti za svoje srodnike, za obavljanje svojih dužnosti, kao ni poklone koji utiču ili mogu uticati u obavljanje njegovih dužnosti, osim protokolarnih poklona.
- (2) Poklonom u smislu ovog zakona smatra se lična korist u vezi sa vršenjem javne dužnosti, a podrazumijeva: stvari, prava, usluge bez naknade, te neku drugu ličnu korist datu ili obećanu nosiocu javne funkcije.
- (3) Poklon u vrijednosti do 200,00 KM nosioci javne funkcije mogu zadržati i ne trebaju ga prijaviti.
- (4) Poklonom u smislu stava (3) ovog člana smatra se i više poklona poklonjenih od istog lica u periodu od jedne godine.
- (5) Poklone iznad vrijednosti iz stava (3) ovog člana nosioci javne funkcije ne smiju zadržati, već su ih obavezni prijaviti i predati organu vlasti u čije ime vrše povjerenu javnu dužnost.
- (6) Nosilac javne funkcije ne smije primiti novac, ček ili drugi vrijednosni papir bez obzira na iznos.
- (7) U slučaju sumnje o vrijednosti poklona nosilac javne funkcije dužan je zatražiti račun od davaoca poklona.
- (8) Vrijednost poklona je njegova tržišna vrijednost.
- (9) Primanje poklona prema st. od (1) do (8) ovog člana odnosi se i na lica koja prime poklon u korist nosioca javne funkcije.

Član 15. (Protokolarni pokloni)

- (1) Protokolarnim poklonima smatraju se pokloni darovani od predstavnika stranih zemalja i međunarodnih organizacija prilikom službenih posjeta.
- (2) Odmah po prijemu, ili nakon povratka u zemlju, nosilac javne funkcije koji je primio protokolarni poklon mora da obavijesti organ ili instituciju u kojoj vrši javnu funkciju.
- (3) Protokolarni pokloni postaju vlasništvo organa ili institucije u kojoj nosilac javne funkcije obavlja dužnost.
- (4) Protokolarni pokloni i to: državni simboli, medalje i protokolarne oznake mogu se upotrijebiti tokom obavljanja službene dužnosti.

Član 16. (Registracija poklona)

- (1) Svi primljeni pokloni i njihova odgovarajuća vrijednost, kao i imena lica koja su dala i primila poklon, obavezno se unose u Registar iz člana 6. stav (3) ovog zakona.
- (2) Odredbe ovog zakona koje se odnose na proceduru i prijavu imovine kao i rokovi za prijavu imovine, odnose se i na poklone.

POGLAVLJE IV – REGISTRACIJA I VOĐENJE PRIJAVA IMOVINE

Član 17.

(Sadržaj prijave)

- (1) Obrazac prijave obavezno sadrži:
 - a) ime i prezime nosioca javne funkcije koji podnosi prijavu i njegovu funkciju,
 - b) ime i prezime bliskih srodnika koji podnose prijavu,
 - c) matični broj, koji se ne objavljuje javno,
 - d) naziv organa ili institucije u kojoj je lice zaposleno/imenovano, adresu institucije, datum imenovanja na funkciju,
 - e) datum predaje prijave,
 - f) nepokretnu imovinu i njenu vrstu, opštinu odnosno grad i državu ukoliko se nalazi u inostranstvu, površinu, porijeklo, njenu nabavnu vrijednost i u čijem je vlasništvu, da li se radi o suvlasništvu i u kolikom procentu, vrstu i izvor sredstava kojima je kupljena ta imovina,
 - g) pokretnu imovinu i njenu vrstu, godinu proizvodnje ili kupnje, njenu nabavnu vrijednost, i u čijem je vlasništvu, potpune podatke o dionicama u privrednim društvima ili nekoj drugoj instituciji, vrijednosnim papirima, finansijskim obavezama, koje lice podnosi prijavu ima prema fizičkim i pravnim licima,
 - h) podatke o učešću u nadzornim odborima, upravnim odborima i slično, bez obzira da li se vrše uz naknadu ili bez naknade,
 - i) ukupne godišnje prihode podijeljene s obzirom na izvor prihoda,
 - j) ličnu izjavu kojom se pod punom moralnom, krivičnom i građanskom odgovornošću potvrđuje istinitost podataka u prijavi,
 - k) ličnu izjavu kojom se pod punom moralnom, krivičnom i građanskom odgovornošću potvrđuje da ni jedan dio imovine nije izostavljen iz prijave,
 - l) potpis podnosioca prijave.
- (2) Obrazac prijave iz stava (1) ovog člana sastavni je dio i prilog ovog zakona.
- (3) Svaka obrada ličnih podataka iz Registra vrši se u skladu sa Zakonom o zaštiti ličnih podataka Bosne i Hercegovine („Službeni glasnik Bosne i Hercegovine“, br. 49/06, 76/11 i 89/11-Ispravka) i zakonima Brčko distrikta.

POGLAVLJE V – KONTROLA PRIJAVLJENIH PODATAKA

Član 18.

(Kontrola prijavljivanja)

- (1) Kancelarija vrši kontrolu prijavljivanja imovine i poklona nosioca javne funkcije.

- (2) Svaka prijava se provjerava u cilju utvrđivanja postojanja ili nepostojanja materijalnih grešaka ili pogrešno popunjenih prijava.
- (3) Ukoliko se utvrde materijalne greške ili greške u popunjavanju ili je prijava nepotpuna Kancelarija obavještava podnosioca prijave koji je u roku od 15 dana od primanja obavještenja, obavezan da prijavu ispravi ili dopuni.
- (4) Kancelarija je nadležna da vrši kontrolu podataka o imovini i izvore i vrstu prihoda kojima je imovina kupljena.
- (5) U slučaju nesrazmjera između prihoda i imovine, kao i u slučaju osnova sumnje u istinitost podataka i zakonitosti načina na koji je imovina stečena, Kancelarija je dužna o tome obavjestiti nadležno tužilaštvo, odnosno druge nadležne organe uključujući, ali ne ograničavajući se na porezne organe i Finansijsko obavještajnu jedinicu SIPA-e.

Član 19.

(Obaveza davanja podataka)

- (1) Kancelarija ima pravo da vrši provjeru podataka nosilaca javnih funkcija.
- (2) Kancelarija ima ovlaštenje pribavljati i obrađivati lične podatke u skladu sa Zakonom o zaštiti ličnih podataka Bosne i Hercegovine i Brčko distrikta, isključivo u svrhu provjere tačnosti, odnosno istinitosti navoda sadržanih u prijavi imovine.
- (3) Kancelarija ima ovlaštenje obratiti se sa zahtjevom za dostavu podataka svim nadležnim institucijama, kao i pravnim i fizičkim licima koji raspolažu podacima relevantnim za provjere utvrđene odredbama ovog zakona.
- (4) Smatra se da su obaveznici prijave imovine saglasni sa ovlaštenjima Kancelarije navedenim u odredbama st. (1), (2) i (3) ovog člana, što se izričito navodi u obrascu prijave.

Član 20.

(Javnost)

- (1) Organi nadležni za provođenje ovog zakona, dužni su sve svoje aktivnosti (izvještaje, informacije i dr.) učiniti dostupnim i javnim, putem svoje službene web stranice.
- (2) Radi obezbjeđivanja transparentnosti, informacije o odbijanju dostavljanja ličnih podataka o imovini i drugi podaci iz evidencija će biti dostupni javnosti.
- (3) Javna dostupnost ličnih podataka o cjelokupnoj imovini nosioca javne funkcije vrši se navođenjem podataka o tome gdje se imovina nalazi, shodno čl. 8. i 17. ovog zakona.
- (4) Podaci iz člana 8. i 17. ovog zakona će biti dostupni i objavljeni na web stranici.

POGLAVLJE VI – KAZNENE ODREDBE

Član 21. (Neprijavljivanje imovine ili davanje lažnih podataka o imovini)

- (1) Nosilac javne funkcije koji ne prijavi imovinu ili poklon Kancelariji ili daje lažne podatke o imovini ili poklonu, u namjeri da prikrije podatke o imovini i poklonu, ima rok od 15 dana da koriguje svoju prijavu ukoliko je došlo do greške slučajno, u

suprotnom krši obaveze utvrđene ovim zakonom, a koja kršenja ne predstavljaju obilježja krivičnog djela, kaznit će se:

- a) novčanom kaznom od 1.000 do 2.500 KM, za kašnjenje u godišnjem prijavljivanju imovine (član 10. stav 1.)
 - b) novčanom kaznom od 10.000 do 20.000 KM, za neprijavlјivanje imovine prilikom preuzimanja dužnosti (član 9.);
 - c) novčanom kaznom od 10.000 do 20.000 KM, za neprijavlјivanje imovine na zahtjev Ureda (član 12.);
 - d) novčanom kaznom od 10.000 do 20.000 KM, za neprijavlјivanje imovine poslije udalјavanja sa funkcije (član 11.).
 - e) Za ponovljeni prekršaj iz stava (1) tačka a) ovog člana, nosilac javne funkcije kaznit će se novčanom kaznom od 3.000 do 6.000 KM.
- (2) Ured pokreće prekršajni postupak za prekršaje iz ovog člana, u skladu sa Zakonom o prekršajima Brčko distrikta BiH („Službeni glasnik Brčko distrikta BiH“, broj 24/07 i 29/16).
- (3) Ukoliko prekršaj propisanih obaveza iz ovog zakona sadrži obilježja krivičnog djela, Ured podnosi krivičnu prijavu nadležnom tužilaštvu s obzirom na to da obrazac prijave imovine, stupanjem ovog zakona na snagu, ima status službene isprave u skladu sa Krivičnim zakonom Brčko distrikta BiH.

Član 22.

(Zastarjevanje)

- (1) Postupak za primjenu sankcija koji se odnosi na kršenje ovog zakona obavezno se pokreće u roku od 30 dana od dana saznanja o slučajevima kršenja ovog zakona, a najkasnije u roku od pet godina od dana kršenja ovog zakona.
- (2) Djela koja imaju obilježja krivičnih djela propisanih Krivičnim zakonom Brčko distrikta BiH zastarijevaju u skladu sa odredbama Krivičnog zakona Brčko distrikta BiH.

Član 23.

(Disciplinska odgovornost zaposlenika Ureda)

Rukovodilac i zaposlenici Kancelarije, u svom djelokrugu rada i obavezama utvrđenim u ovom zakonu, podliježe disciplinskoj odgovornosti shodno posebnim propisima.

POGLAVLJE VII – PRELAZNE I ZAVRŠNE ODREDBE

Član 24.

(Donošenje podzakonskih propisa)

Vlada će u roku od 30 dana od dana konstituisanja Kancelarije, na prijedlog Ureda, donijeti Uredbu o uspostavljanju i vođenju Registra ličnih podataka o imovini i

postupku provjere imovine iz člana 1. ovog zakona, kao zbirke ličnih podataka, kojim će se urediti oblik, sadržaj i način vođenja Registra, kao i druga pitanja od značaja za vođenje Registra.

Član 25.

(Saradnja Kancelarije sa nadležnim organima)

Kancelarija će ostvariti saradnju sa Agencijom BiH za prevenciju korupcije i koordinaciju borbe protiv korupcije, dostavljajući sve potrebne podatke i informacije po zahtjevu Agencije BiH, a u cilju sprečavanja korupcije, izrade i provođenja strategije za borbu protiv korupcije i akcionim planovima.

Član 26.

(Važenje zakona)

U slučaju da se drugi propisi viših nivoa vlasti, koji se odnose na materiju regulisanu ovim zakonom, promijene ili donesu novi nakon stupanja na snagu ovog zakona, ovaj zakon će se uskladiti sa odredbama tih zakona.

Član 27.

(Prijava imovine i poklona nosioca javnih funkcija)

- (1) Zatečeni nosioci javne funkcije u trenutku stupanja na snagu ovog zakona obavezni su da prijave imovinu i poklone iz člana 8. ovog zakona, u roku od 30 dana od dana stupanja na snagu ovog zakona.
- (2) Ured će, u skladu sa ovim Zakonom, provesti procedure provjere imovine svih nosilaca javnih funkcija vlasti od potvrđivanja rezultata opštih izbora održanih 2014. godine i lokalnih izbora održanih 2016. godine, uključujući i opšte izbore održane 2018. godine, pa do dana stupanja na snagu ovog Zakona.

Član 28.

(Rodna neutralnost izraza)

Riječi i pojmovi koji imaju rodno značenje korišteni u ovom zakonu odnose se jednako na muški i ženski rod, bez obzira jesu li korišteni u muškom ili ženskom rodu.

Član 29.

(Stupanje na snagu)

Ovaj zakon stupa na snagu osmog dana od dana objavljivanja u "Službenim glasniku Brčko distrikta BiH".

O B R A Z L O Ž E N J E

I - PRAVNI OSNOV ZA DONOŠENJE ZAKONA

Pravni osnov za donošenje ovog zakona su članovi 1. i 22. Statuta Brčko distrikta BiH.

II - RAZLOZI ZA DONOŠENJE ZAKONA

Kao jedan od razloga za donošenje ovog zakona je obaveza proizašla iz međunarodnih konvencija koje je Bosna i Hercegovina ratificirala, a to je Konvencija o borbi protiv korupcije ("Službeni glasnik BiH"-Međunarodnih ugovori, broj 5/06), koja propisuje u članu 6.:

"(1) Svaka država stranka će, u skladu s osnovnim načelima svog pravnog sistema, uspostaviti, prema potrebi, tijelo ili tijela za sprječavanje korupcije sredstvima kao što su:

a) provođenje politike pomenute u članu 5. ove Konvencije i, gdje to odgovara, nadgledanje i koordiniranje provođenja te politike;

b) unapređenje i širenje znanja o sprječavanju korupcije.

(2) Svaka država stranka će osigurati tijelu ili tijelima pomenutim u tački 1. ovog člana potrebnu nezavisnost, u skladu sa osnovnim načelima svog pravnog sistema, kako bi to tijelo ili tijela mogla vršiti svoje funkcije uspješno i neometano od bilo kakvog neopravdanog uticaja. Treba osigurati neophodna materijalna sredstva i specijalizirano osoblje, kao i obuku tog osoblja za obavljanje funkcija." Pored međunarodne konvencije, pravni osnov za donošenje ovog zakona sadržan je u članu 23. Zakona o Agenciji za prevenciju i borbu protiv korupcije („Službeni glasnik BiH“, br. 103/09 i 58/13), koji propisuje: „Entiteti, kantoni i Brčko Distrikt Bosne i Hercegovine mogu odrediti novu ili postojeću upravnu strukturu koja će biti zadužena za sprečavanje korupcije, izradu i provođenje strategije za borbu protiv korupcije i akcionih planova u tom entitetu ili Brčko Distriktu Bosne i Hercegovine“.

S obzirom na opredjeljenje Demokratske fronte na transparentan rad i borbu protiv korupcije, ovaj zakon je jedan od ključnih koraka u pravcu transparentnosti. Naime, predmetnim zakonom se utvrđuju obaveze nosiocima javnih funkcija u Brčko distriktu da prijave zatečenu imovinu i prihode, porijeklo i promjene imovine i prihoda kao i poklone koje dobiju u toku obavljanja javne funkcije, čime se pokazuje i iskazuje spremnost na transparentnost u radu.

Ovim zakonom određen je Ured za borbu protiv korupcije za organ nadležan za provođenje ovog zakona i uspostavu Registra imovine i poklona nosioca javnih funkcija, te je ujedno određen kao i kontrolor ličnih podataka shodno Zakonu o zaštiti ličnih podataka. Nadzor nad radom ovog Ureda, koji se odnosi na provedbu ovog zakona, vrši Skupština Brčko distrikta BiH, neposredno. Utvrđeno je i minimalno finansiranje Ureda za u iznosu od 0.05 % od prihoda Budžeta Brčko distrikta BiH.

III – PRAVNA RJEŠENJA

Član 1. – Utvrđuje šta je predmet Zakona.

- Član 2. – Propisuju se principi djelovanja.
- Član 3. – Propisuje se svrha evidencije.
- Član 4. – Propisuju se pojmovi i njihova značenja u ovom zakonu.
- Član 5. – Propisuje se da je nadležni organ za provedbu Zakona Ured.
- Član 6. – Propisuje se da je Ured kontrolor ličnih podataka.
- Član 7. – Propisuje se nadzor nad provedbom Zakona koji vrši Skupština Brčko distrikta neposredno.
- Član 8. - Propisuje koju imovinu su nosioci javnih funkcija dužni prijaviti.
- Član 9. – Propisuje obavezu prijavljivanja imovine prilikom preuzimanja dužnosti.
- Član 10. – Propisuje obavezu godišnjeg prijavljivanja imovine.
- Član 11. – Propisuje obavezu prijavljivanja imovine poslije završetka dužnosti ili razrješenja.
- Član 12. – Propisuje da Ured uvijek može tražiti od izabраних носilaca izvršnih funkcija i savjetnika da dostave traženu informaciju o imovini.
- Član 13. – Propisuje pravo uvida u Registar, ispravku, brisanje i blokiranje podataka ako su netačni ili nisu prikupljeni u skladu sa zakonom i pravilima za prikupljanje podataka.
- Član 14. – Propisuje primanje poklona, šta se smatra poklonom i koji se poklon ne treba prijavljivati.
- Član 15. – Propisuje šta se smatra protokolarnim poklonom i čije je vlasništvo takav poklon.
- Član 16. – Propisuje registraciju poklona.
- Član 17. – Propisuje sadržaj obrasca i prijave.
- Član 18. – Propisuje kontrolu prijavljenih podataka i obaveze Ureda.
- Član 19. – Propisuje se obaveza davanja podataka.
- Član 20. – Propisuje javnost rada Ureda.
- Član 21. – Propisuje sankcije za neprijavljivanje imovine ili davanje lažnih podataka o imovini.
- Član 22. – Propisuje zastarjevanje za primjenu sankcija u roku od pet godina od navodnog kršenja Zakona i zastaru prema odredbama Krivičnog zakona Brčko distrikta.
- Član 23. – Propisuje disciplinsku odgovornost rukovodioca i zaposlenika Ureda.
- Član 24. – Propisuje rok od tri mjeseca za donošenje Uredbe o uspostavljanju i vođenju Registra nosilaca javnih funkcija kojim će se urediti uspostavljanje jedinstvene elektronske evidencije, oblik vođenja registra, subjekti upisa, sadržaj i oblik potrebne dokumentacije, unos, čuvanje i zaštita prikupljenih podataka.
- Član 25. – Propisuje saradnju Ureda sa nadležnim organima (Agencijom).
- Član 26. – Propisuje obavezu usaglašavanja ovog zakona sa zakonima viših nivoa vlasti koji se primjene ili donesu novi, a koji regulišu ovu materiju.
- Član 27. – Propisuje prijavu imovine zatečenih nosioca javne funkcije.
- Član 28. – Propisuje se rodna neutralnost riječi i pojmova.
- Član 29. – Propisuje stupanje na snagu Zakona osmog dana od dana objavljivanja u „Službenim glasniku Brčko distrikta BiH”.

IV – FINANSIJSKA SREDSTVA

Za provođenje ovog zakona nisu potrebna dodatna finansijska sredstva iz Budžeta Brčko distrikta.

